

Rizah Grahić, ing. geod.



Na dan 24. septembra 2003. godine teška bolest iznenada je iz naše sredine otrgla ing. Rizaha Grahića aktivnog člana našeg Udruženja.

Rizah je rođen 1940. godine u Zenici. Geodetsku tehničku školu završio je 1960. godine u Sarajevu, potom radio u katastarskim uredima u Kiseljaku, Sokocu i "Bosnaputovima". Godine 1975. kao vanredni student završio je Višu geodetsku školu u Sarajevu.

U "Petroinvestu" radi duži niz godina na razvoju gasne mreže u BiH gdje dostiže zvanje glavnog inženjera projekta izgradnje gasovodnog sistema.

Posljednjih godina radio je u "Energopetrolu" i "BiH-gasu" gdje je i završio svoj radni vijek i otišao u mirovinu.

Iako po zanimanju geodetski inženjer izuzetno se zanimao i uključivao i u druge struke koje su ga na poslu okruživale. Rezultat toga interesovanja i rada kao i želja da svojim saznanjima pomogne mladim stručnjacima da se lakše suoče sa problemima u svom radu je njegovo autorsko djelo "Transportni cjevovodi" koje je kruna njegove stručne karijere.

Predanim radom zasluženu mirovinu nije, na žalost, dugo uživao, kao da se njegov energični i nemirni duh nije pomirio sa tim statusom.

Rizah Grahić je cijelo vrijeme bio aktivan član Udruženja građana geodetske struke BiH i uključivao se u sve aktivnosti koje je provodila Podružnica Sarajevo.

Dostojanstven i dirljiv je bio posljednji Rizin ispraćaj na groblju "Lav" 26. septembra 2003. godine. Porodica se zauvijek oprostila od nježnog supruga, brižnog roditelja, dragog brata, i rođaka, a komšiluk od pažljivog komšije.

Izviđači su ispratili izuzetno aktivnog člana ove, iz Razine mladosti, popularne organizacije u kojoj je on kroz dugi niz godina prošao put od aktivnog člana do odgovornog rukovodioca.

Na ispraćaju su najbrojnije bile radne i školske kolege, članovi našeg Udruženja koji ostaju bez dobrog kolege i siromašniji za jedan blagi osmijeh koji bi se pri svakom susretu ozario sa Rizinog vedrog lica.

*Anđelko Gaco*